



荔園詩續鈔卷三

庚辰至辛巳

遣懷

鼎鼎新年改故年，別無長物但青氈。  
偶添詩課耽宵坐，時報花開破午眠。  
品或稱高因習懶，交圖可久莫言錢。  
癡頑一味垂垂老，不覺羞顏到鏡邊。

春遊卽事四首

信步南塘看晚潮，迎風弱柳一條條。  
多情不爲傷離別，送我扶藜過板橋。

普渡菴西憩小亭，紛紛鷗鳥集沙汀。  
隔江山色最難得，荔園詩續鈔

卷三

一

俗眼相看無此青

羨他風景屬村家，閣閣蛙聲水一涯。  
可惜春光看太賤，溷藩也種碧桃花。



聽鶯最好教場南，斗酒攜來興已酣。  
猶有夢魂長遶處，夢魂長遶處州城宋曾茶山句多年不見永嘉柑。

舟次詠逆風

鞞鞫聲聲白浪中，推移力費上灘同。  
耐他逆勢休相鬥，掉轉船頭卽順風。

踏青詞二首

野航載得兩三人，插鬢山花也自新。  
畢竟村閨風氣古，



嬉春從不解傷春

南隣北里一羣羣姊妹相呼袂似雲賺得遊人齊目斷  
石榴紅是嫁時裘

梅花書屋看牡丹三首

破瓦頽垣盡是苔幾叢追憶手親栽

梅花書屋係伯祖符軒先生讀書處

牡丹爲其手植今屋已荒圯

喚他勢利花寧受

富貴花原勢利偏向花趨甌北句

荒齋爛漫開

紫氣東來透幾枝石欄干外半開時吹噓同荷天公力

富貴中還判早遲

就中紫色者先開

自送才郎赴玉樓蒼涼書屋此重遊

自乾隆壬申歲甲子繼才姪來孫喪後

荔園詩續鈔

卷二

二

今重至此看花本是娛情事可奈今朝動我愁

遣興

薔薇開遍淺淡紅怎奈摧殘雨又風昨日仰看今俯看  
盛衰一霎眼光中

讀大蘇始皇論爲衍其意

馭世有宏綱不在嚴法制百祿何以道剛柔兩相濟秦  
自孝惠後虎狼逞橫噬衛鞅與范雎峻刻加之厲刑戮  
及師傳親貴不遑議森森刀鋸列誰敢以身試所以殿  
下兵坐視荆卿刺矯詔殺扶蘇李相肆無忌火烈難嚮  
邇爲法乃自燹燔書愚其民隳城畧其地自謂萬世統

縣延一姓嗣困獸尙欲鬥物極有反勢沙邱載鮑魚遺  
臭人掩鼻六國起報仇逐鹿爭樹幟我思古帝王漸仁  
更摩義元氣沁人心苞桑固神器忠厚開丕基并吞恃  
小智讀史得龜鑑成敗較然矣知周八百年奚恠秦二  
世

紀夢

依稀趙北又燕南四十年前此駐驂一剪殘燈中夜飯  
者般光景夢猶諳

乾隆庚辰歲駿補弟子員今歲值周甲送學日賦

贈諸君子四首

荔園詩續鈔

卷三

三

登龍曾謁李膺堂

前庚辰文宗爲滇南李鶴峯先生

大小從公列幾行

安得故人重話舊宛如老婦憶催粧三秋已飽蓴鱸味

卅載猶懷苜蓿香

在括廿七年癸酉回藉

高唱錢盧兩前輩

錢瓊沙盧

抱經兩前輩皆有重遊泮宮詩繼聲願附曾靈先

前庚辰至後庚辰六十年周算八旬弛擔久爲門外漢  
賭棋曾作局中人自憐衰態朝衫舊爭羨英才試草新  
西抹東塗成底事又攀桃李一番春

青旗笈笈間鳴鸞迎出州橋夾道觀忽動喜心因見獵  
且隨新沐慶彈冠路雖問馬終嫌老梅到成龍尙帶酸  
手掇芹香染梨栗歸分童穉有餘權

泮水清漣增影浮靈鍾文筆屬名流

鎮海增影見于泮池爲文筆峯主科

第秀才定兆聰三耳我輩甘輸出一頭筵席修儀賓秩

秩笙簧鳴盛鹿呦呦公門盡荷栽培力擢第他年報魯

侯

### 謝丹山贈還少丹

荔園老病日催促行步槩跚背卷曲故人侈言還少丹

齒可重生頂免禿千丸贈我舉家喜不死之藥勸勤服

荔園且服且大笑人心往往不知足昔我祖父皆下壽

花甲而外算難續我今忝加二十齡得隴柰何又望蜀

修蛇赴壑勢必然縱有金丹那可贖祗因重感故人情

荔園詩續鈔

卷三

四

餌之可代防風粥休論功效定何如此贈聊寓兕觥祝

### 八十自述八首

鮮民啣恤復何言景逼桑榆更討源 誥軸久經蒙

帝錫瀧碑尙未勒親恩慈縫兩袖鍼痕在嚴訓千行墨

瀋存時聽小名呼夢裏依依猶自戀晨昏

冰冷頭銜媿顯揚敢云報 國有文章半生湖海多親

歷卅載齋鹽已飽嘗書鎖桓元隨羽化菊栽靖節滿園

荒可憐春燕歸來候但見殘泥落畫梁

官栝廿七年家中房戶書籍俱

被入  
侵毀

才不才間處最難倦飛聊覓一枝安論交盡屬忘年友

課讀仍如本分官怕煞虛名售鼠璞羞從當道乞猪肝  
門前便是滄浪水且約漁翁把釣竿

黑頭漸變白鬚眉幾許悲歡盡入詩疥壁不嫌鴻印爪  
灾梨妄想豹畱皮官梅東閣添文典春草西堂寄夢思  
所歉嫁婚俱已畢遨遊五嶽竟無期

三樂平生慕啟期靜觀自得有誰知偶然戲謔何嘗虐  
能了貪嗔豈礙癡鞭曳蘆花矜健步羹烹芋糝免調饑  
溫柔新製湯婆好正是非人不暖時

追思承蓋與扶輪科第源流萃此身每感程門親授鉢  
曾開馬帳傲傳薪黌宮又值鋪筵候花甲剛逢采藻辰

荔園詩續鈔

卷三

五

倘祝瓊林重赴宴笑他說夢向癡人

百歲光陰過隙駒何曾反哺彷彿慈烏猶祈膝下承歡去  
未識冥間益算無先嚴慈明年俱百歲陰壽但願寒瓊畱世澤好將

破硯付孫雛芳心且耐冰霜苦竚望春回九九圖

一生名利兩蹉跎少不如人老柰何屢愧先生稱好好

謬推良士已番番奉觴只望儀文少答禮尤防拜跪多

卻荷朋箋早投贈麗詞那得雪兒歌

親友見賜祝詞甚多

閒

得消字同朱少僊作

地行仙子日逍遙清福修來豈倖邀風月萬錢難買取  
利名一算盡句消逢僧竹院聊扳話迎吏郵亭罷折腰

此樂莫教兒輩覺五車勤讀書連宵

拙得眞字

巧匠紛紛日罔新那堪衆裏自嫌身狙公賦芋頻遭誑  
鳩婦營巢枉費神鞭得聰明殊乏術鑿開渾沌亦非眞  
十三經寫蒙 宸賞海內誰如拙老人

蔣湘帆衡金壇人號江南拙老

人嘗寫十三經大學士高斌進之  
欽賜國子監學正見感舊集

秋蚊

寒風颯颯動紗幮尚有飛蟲欲嗜膚幾度牀頭尋扇撲  
也關涵養欠功夫

不寐

荔園詩續鈔

卷三

六

雙眸炯炯柰長宵如豆青燈伴寂寥不管愁人聽不得  
風聲荷葉雨聲蕉

對菊感賦二首

信到重陽作意催參差幾朶向人開也曾費盡栽培力  
佳種如何竟變來

興味蕭然罷舉觴落英滿徑太荒涼獨畱一榦支秋色  
又被蒙頭幾夜霜

哭俞漱園表姪五首

三旬前共話中懷永訣誰知卽此回今日拖泥還帶水  
心酸一路哭君來

揆喪值  
大雨

徵逐名場少壯時擔囊負笈鎮相隨  
兩家行輩何須論情是同胞學是師

宦遊栝嶺與蕭山往返郵書久缺然猶憶趨公尋樂處

畫船載酒岳墳邊

甲子歲送秋試相邀  
載酒汎湖拜岳王墓

冰冷頭銜道自尊故園松菊幾株存  
罷官那得團圞樂

彼此麻衣搵淚痕

余以癸酉歲丁內艱歸澁  
園以丙子歲丁外艱歸

死喪踵至力難任料得三年泣血淡遺囑  
細聽休毀瘠

愛兒一樣愛親心

### 鶴夢

羽族中藏隱逸流朦朧睡去更清幽  
一年自孕青田種

荔園詩續鈔

卷三

七

半夜曾陪赤壁遊寒守梅花枝上月

天寒有鶴守  
梅花明人句響驚

露滴草間秋乘軒看破邯鄲枕笑指白雲天際頭

### 蝶夢

本是仙衣幻化形華胥國裏也曾經  
多緣豔色迷來久從此離魂喚不醒  
幾度沈酣忘撲扇一場遊戲任搖鈴  
滕王縱有傳神筆還向莊生好乞靈

### 讀楊忠愍公遺集

君恩圖報繕彈章吏議淡文引二王骨  
被干槌終不朽心經百鍊竟成剛  
蚍蛇那及渾身膽枷鎖猶聞滿路香  
遺囑一篇徵定力懦夫讀罷亦軒昂



煖鍋

轟飲期長夜鍋防冷氣侵中虛堪鍊炭外鑠擬銷金幾  
爛持羹手尤熏欲炙心不知高尚士臥雪正饑噉

題畫梅

幾點疎花寫照難一甌冰水蘸毫端兩間清氣全歸爾  
俗眼看來盡道寒

遣悶

滾滾潮頭響拍灘幾番有約未曾看屢約丹山看海  
潮事沮不果事  
多前定謀何益人到衰齡興總闌嫩綠依窗憐草長嬌

紅委徑惜花殘誰教春色堂堂去撥觸閒愁一倚欄

荔園詩續鈔

卷三

八

枕上口占

向時曾作宦遊身此日江鄉一散人氣節要從貧裏見  
精神倍覺老來珍誦緣思睡頻拋卷唵怕生愁不送春  
八十年聽歌擊壤又看桑柘一番新

漫興

荒園日涉喜天晴手摘椿芽好作羹老境健非關壽相  
冷官貧豈得清名隔牆搖曳攀花影滿座琳琅課讀聲  
且與風光共流轉鼠肝蟲臂悟浮生

輓沈蔭堂

泰州尊三首

福曜移來僅半年名齊召杜已喧傳吏無畱牘多休暇

士有微才亦愛憐露宿通宵勤緝匪風清比戶慶安眠  
公每夜巡訪盜風頓弭 那知此夕銀河渡仙眷終歸離恨天  
公歿于七夕時接眷初至

恫瘝念切救多方齋沐頻番叩法王一炷香申中夜禱  
萬民灾願此身當誠無不格真成識恩到難名豈易償  
時疫盛行公各廟祈禱又設壇署齋晝夜籲請願以身代越宿竟逝 追感而今誦誰嗣可  
憐巷哭盡悲傷

琴堂花木落陰移清似冰壺退食時偃室議公會一至  
卯厨式燕悔三辭  
去冬承招飲告辭旋以公舉孝廉溫方正進謂晤語移時和光可挹

和色笑難重見慷慨胸襟尙繫思遺愛千秋生氣在辦

荔園詩續鈔

卷三

九

香合配粵賢祠

寧邑粵賢祠供前任吳公嗣湖易公鳳庭兩州尊長生牌位今設公位于其間

久不攬鏡今晨起試照之訝非昔貌感賦

繩牀臥病歷亨旬曉起今朝攬鏡新癡絕久忘衰已甚  
乍看幾不識何人諛來矍鑠原多謬寫出頽唐此最真  
爾後奚囊須擲去耽吟也怕損精神

幽興

家世由來滿徑蒿杜門卻掃謝塵囂事如我意緣常少  
清要人知品不高作客何曾彈劍鉞訂交寧望贈綈袍  
架頭手澤書猶在展卷長吟也自豪

反哺烏歌 并引

錢菊豪舌耕養親曲盡其孝今遭尊甫可圃先  
生之喪哀毀致瘠駿知死知生傷而兼弔作  
歌以勸之曰

反哺烏尾畢逋爰止屋上朝朝呼孝子聞之淚拋珠孝  
子不農又不賈紙田筆耒耐辛苦堆槃自奉惟黃齋甘  
旨勸親飯加勞雙親得此娛高年今秋介壽容開筵吾  
生鞠育汝能報但願孫曹如汝賢忽然父病類荀偃可圃  
生瘍于頭而歿力辦蓼苓衣盡典一朝升屋號蒼天眼枯見骨

魂不返我勸孝子盍稍寬向來負米親心安五鼎三牲  
世豈少嗷他親腹爲唐園白華修潔古所貴德養較之  
荔園詩續鈔卷三

十

祿養難堂前老母鬢亦雪雞黍逮存更祝噎烏兮烏兮  
且反哺勿效杜鵑夜嘯血

題陳梅坡孝嗣表兄印譜應德先表姪屬

韋續作字源雲書溯黃帝後來斯邈徒變文爲篆隸八  
體有摹印要皆範金製雕鏤花乳石山農又創例鳥跡  
與蟲文貌古尙精細其法等作書入妙在筆氣貴者晶  
玉章姓名期壽世海內文墨家什襲枕中秘嗜古陳梅  
坡中表我爲弟昂然軀七尺宿學擅多藝家傳七葉貂  
文物充諸笥更擬借書瓴臨摹向紳誼剪裁及零箋珍  
惜到隻字搜羅橫古今斑駁雜珠翠彙之成一冊纍印

四千計兄乃喜動色此是吾家瑞手持方寸鐵規彷彿  
神智三橋今復生乞巧者磨至茶瓜畱客談此事最得  
意憶予弱冠時見輒以師事予季曰菡江亦學作譜記  
亡弟菡江亦工鐵筆有印譜四卷惜哉與兄遊先後道山逝幸兄有令  
子箕裘克奮志寶此玉瓏玲手澤玩不置一朝出示予  
撫之淚欲墜如遊羣玉府大觀天廟器嗟彼平泉莊花  
石鬻市肆惟茲清白名書香勝芳桂筆末紙良田豈逐  
眼前利丹山鸚鵡鳴行作凌雲勢

詠懷

世事番番似奕棋癡頑剩有老頭皮蔗竿餐盡全無味

荔園詩續鈔

卷三

菱角磨圓總不時夢裏快談多故友花前痛飲少心知  
忽然惠我清風好瓶插幽蘭放一枝

時稜雲贈  
蘭插瓶

靜觀

拋卻青筇不出門靜觀花影晝移痕啞聾自引家翁分  
閑健俱叨造物恩亡友近來添小友得孫遲可當曾孫  
所嗟一事何嘗做長日厨頭咬菜根

題東坡烏臺詩案

千古奇才屬大蘇酸鹹與俗性相殊詩如白璧原無玷  
案入烏臺孰辨誣受戒未能錐刺舌求疵那得體完膚  
螻龍畢竟蒙清問羞殺王珪一鄙夫

中秋寄郭雪帆

負米郭谿去寢門疎問安如何今夜月不向故園看脫  
口呈天趣澄懷付古權名場心已澹無復夢彈冠

題曹桐石寄示七十漫述詩槩括其意以賀之

我輩相交自有神要于澹處見天真從來寶貴非完璞  
未必科名可重人衣鉢早傳還讀史蓼莪久廢尙思親  
諸公休作程文海喚起東山穩臥身

時朱少仙偕同人公舉桐石應孝廉

方正科桐石堅辭不就

讀東山樓詩續藁多飲酒曠達之言爲題其後寄

桐石

荔園詩續鈔

卷三

三

人生壽無金石固服食仙丹亦被誤蘭亭一序多感慨  
一詠一觴欣所遇我不能揮戈把日畱又不能挽水使  
西流柰何遣此萬古之離愁縱使令名滿身後不及生  
前一盃酒我不嗜酒興堪趁讀君飲酒之詩便當飲剔  
銀釭拍髹几澈夜高歌竟醉矣睡到飯熟之時尙未起

再寄桐石

君不能如曹景宗往來射獵南山中酒後耳熱生微風  
我不能如張志和綠蓑青箬隨煙波得魚換酒時高歌  
彼此生涯課章句非義之財誓弗顧酒戶大小雖懸殊  
皆于此中得真趣所恨蹤跡兩參商帶水盈盈未問渡

何日扁舟乘興來傾吐胸襟慰遲暮功名破甑不復看  
富貴亦如草頭露相逢難得且開樽何以佐之鑪煨芋  
不論主勸與賓酬喜氣滿堂到童穉但願秋雨變黃梅  
畱君十日此間住

扶花

滿架繁英蜿地垂何堪雨打又風吹嬌如瘦燕畱仙候  
倦似肥環未醒時我見猶憐頻接引花應含笑感維持  
尋芳卻笑身忘老手曳扶危杖一枝

贈鞋歌

張宴斟叵羅呼來春夢婆座客請勿喧聽伊贈鞋歌姑

荔園詩續鈔

卷三

三

蘇有女富罕比嫁與朱門貴公子密綴秦珠玳瑁簪新  
裁蜀錦鴛鴦被珠簪錦被百千箱滿載樓船泊玉塘取  
樂歡呼奏弦管朦朧玩月凭紗窗何處扁舟傍船側中  
有嘯聲復太息問知貧女亦于歸身無紅襖首無餘富  
女喚來爾莫愁儂有餘箱任爾抽信手抽一欣然去嫁  
到湖州山裏頭開箱一看奢望了只有繡鞋盡纖巧翡  
翠鑲幫金鳳尖雖非貴重亦堪寶楊妃遺鞵同鮮妍買  
去半箱饒有錢夫耕婦織耐辛苦漸覺小康踰昔年富  
女嬌情厭鍼指睡到日高尙未起起來不自解梳頭環  
立妝臺四五婢公子翩翩狐白裘五陵俠少爭遨遊夜

醉佳人眠鶴市朝鞭駿馬過虎邱朝朝夜夜揮金手鬻  
盡田廬一無有飄然作客忍別離門戶支持剩一婦可  
憐母族亦難憑無奈饑驅且扣門惘惘竟向湖州去瞥  
見曬鞋乘朝暉少時手製今復遇簌簌淚珠禁不住貧  
女餽餉恰相逢細詢乃得知其故殷勤邀宿炊黃梁圖  
報千金愧未遑聊將薄贈作資斧送爾明朝歸故鄉人  
生貧富無非數蒼狗白衣變朝暮蘇公會感春夢婆座  
客聽之也應悟

和蘇鐵史環蟻陣二首

莫笑么魔不自量槐柯南北互侵疆守陴蠻觸牢難破

荔園詩續鈔

卷三

十四

拒轍螳螂怒敢當利逐蠅頭爭戴粒演成蛾術儼分行  
詩人擱筆看遊戲只算淳于夢一場

一股蟲口萬蟻攢中途剽掠起爭端鶴鵝陣設分軍志  
蟻蝨臣趨立將壇墮行聞風招集易竹橋救溺解圍難  
燒殘白蠟猶酣戰從古文場一例觀

適吳楊兩女歸寧喜賦

相思兩地鎮相催盼望歸期歲一回休訝我生增老去  
試看爾輩挈孫來徧分粒糲憐新製薄具羹湯佐舊醅  
趁取團頭談娓娓燈花太喜幾番開

和蘇秋帆

元壽

柳眼二首

長向章臺管送迎相看青眼最多情風其吹女千愁解  
我亦憐伊百媚生面映桃花增婀娜眉爭萱草更分明  
謝孃縱有題詩筆一段秋波寫不成

嫩黃幾樹態天斜曼睩盈盈正放芽初認眠來猶未醒

轉憐老去亦生花垂金露綴明堪洗綴柳訝垂金李傳商隱詠露句

燭煙過暗欲遮定有凝妝樓上女眼穿望堦早還家

和宋樛里穗鳳凰山懷古

龍飛鳳舞聚神州泥馬倉皇到此畱社稷重開迎浙臉  
冕旒共拜壓秦頭紆籌不抵三分局納幣渾亡九世仇  
萬里長城甘自壞金牌飲恨竟千秋

荔園詩續鈔卷三

五

又和岳忠武墓

直抵黃龍誓枕戈一朝寃獄起風波棲霞荒竈魂猶毅  
勒碣精忠字不磨扣馬書生工計策騎驢老將忍經過  
傷心更有冬青引玉盃金魚出冢多

題張火蓮模孤蓬自振圖

丈夫五十鬢未雪獨立蒼茫罕與匹平生得心應手技  
默默相知一管筆吾家草聖顛復顛以頭濡墨生雲煙  
孤蓬自振妙比喻法乳遙遙傳火蓮火蓮昂然軀八尺  
不屑因人就竈熱今看書法如其人不藉麻扶見直節  
曾經南北馳要津文章有道交有神貴戚豪門求墨跡



歸來倒篋踰千緡結廬乃在城之北幾樹碧梧幾竿竹  
買山不費一文錢臥遊寫作山水幅綠陰環榻晴窗開  
興酣落筆風雨來人生樂事無過此富貴于我何有哉  
我聞心正則筆正自愧蓬心去未淨從他紙價騰洛陽  
乞惠一箋定不吝

荔園詩續鈔

卷三

六

荔園詩續鈔卷四

壬午至甲申

海昌張駿信裳

五人墓和朱子藍

不然璫且竊神器賴此一擊使知忌南方之強性本柔  
怒髮忽冲浩然氣當時聞逮周吏部舉幡號救執仗義  
輿臺乃有不平鳴奮臂一呼斃一尉明知抱薪災及身  
慷慨殉亡亦快意嗟哉逆倣正熏天五虎五彪助厥勢  
好官雖有寇知府申雪無權但灑淚後來姦黨服憲典  
藁葬道旁人掩鼻之五人者俠骨香墓傍要離高位置  
人生自古皆有死鴻毛泰山輕重異我今酌酒弔英魂  
荔園詩續鈔卷四  
一

作此好歌續碑記

漫興寄楊書巢親家

時憲書頒又換新頑然八十二年身幾番拋卷如逃塾  
到處登筵便壓賓善飯偏逢無米日愛花仍作有情人  
何時賒取鄰家酒相約隅園去討春

和錢菊豪雪中飼雀

唧唧復唧唧麻雀簷頭立今年鶴語寒雨雪況十日草  
根已深埋虫蟻亦深蟄毛羽且忍凍饑喉救最急低頭  
窺土銜欲下似羞澁主人食粥耳瓶剩幾多粒撒空如  
撒珠翩然乃羣集一啄一四顧誠恐被掩執好語謝麻

雀機心我所嫉曾來海上遊沙鷗頗馴習微甘今逮汝  
聊以寓賑卹明朝倘開霽巢止善人室世上綱羅多慎  
勿輕出入

送子藍入都應試

三千里外飽風塵解愛此身卽愛親筋力無多須自量  
顯揚有志會能伸開時赴約歡休盡澹處論交味始眞  
一度逢場一淡省老夫也是過來人

棹成

蜉蝣身世寄乾坤逆旅須知偶爾存蠶老三眠絲作繭  
樹高千丈葉歸根豫茲凶事寧非禮假我天年亦感恩  
荔園詩續鈔 卷四 二  
多謝親朋齊祝壽笑斟杯酒祭詩魂

吳上申贈白牡丹

佳種繽紛滿畫欄養餘堂牡丹多佳種分來一朵白團圞神仙迴

與凡姿別富貴能畱本色難香帶露華尤細細影搖珠  
箔更珊珊世間兩美終須合珍重芳心配素蘭又多素蘭曾以

贈見

幼心司馬招同邑中文士二十七人雅集聽潮陰

館縱談詩文賦謝二首

會稱眞率御奢華燔炙芬芬衆口誇壓座難辭頭帶雪  
序齒余忝居上座奪魁已兆手揆花時行藏興來連襪遊仙閣

醉後分箋放午衙準擬趨公時一至休敍散去等搏沙  
資分膏火典朝衣每課士獎賞甚厚如此憐才近已稀河鯉飛  
騰看跋浪海鷗翔集爲忘機論詩細細金針度談藝翩  
翩玉屑霏大小從公齊飽德暮潮聲裏醉言歸

棄蠶歎

日暖蠶眠早雨少桑茂遲葉較往年價貴且十倍之典  
質罄所藏惟恐蠶擔饑聞有善算者棄蠶鬻桑枝忍看  
千萬箔鵝鴨啜諸池此亦係生靈衣被神工施計利乃  
害義剛腸一至斯蠶或過歲歉輒怨天不慈天豈有不  
慈人何不自思世態盡忘本令我一長歎

荔園詩續鈔

卷四

三

晝眠

風景清和不出門晝眠頭白笑昏昏了無情話陪生客  
饒有天機愛女孫福亦安知非失馬味原何必定嘗鼈  
升沈懶向君平卜靜看浮雲過幾番

禽言十一首和宋檮里

不如歸去饑來敲我此間住此間物貴居亦難惘惘出  
門乃知誤故鄉卻無避倩臺商量歸去歸何處

提壺盧沽美酒前年米賤酒味厚半百青錢沽幾斗今  
年再想酒到口酒字偏旁去其酉

布穀布穀二三月催人下種嗚不歇種得良苗三寸長

農功費盡已捐瘠不見廁鼠一朝登大廡飽食無憂貌  
肥澤

泥滑滑走倉皇茅店三朝兩板橋一夜霜綠蓑青箬愁  
淋浪行路難尙故鄉不見九折坂頭馬上郎失勢一落  
千丈強

麥熟卽快活差免啖糠覈百畝之糞籽本多醫得瘡時  
囚已割東陌啣秧插西陌安穩不如鴉種麥

姑惡姑惡聲聲哭婦初入門姑不惡只緣長舌有小姑  
日向堂前事謠詠一朝逐婦去婦苦小姑樂小姑小姑  
且勿樂他年作婦苦方覺

荔園詩續鈔

卷四

四

瘦兒瘦兒兒或號寒兒或號饑肥兒有丸謀諸醫二老  
風中燭痛癢知不知不見郭巨乳姑埋卻兒

兒歸兒不歸終夜啾啾雄與雌勸爾且勿悲試想當年  
捨母時同此心腸今始知

脫卻破褲破處紉緘補顛倒紫鳳與天吳卻笑羅紈不  
如布最憐遇旱踏車時赤條條地裊當褲

得過且過得意事常少失意事常多富貴原如春夢婆  
何必長歌喚柰何

行不得也哥哥登山有豺虎涉水有鼃鼃世間坎窞何  
其多此後雄飛變雌伏縱有機心柰我何

雜言四首和樗里

少微星忽賈謝數實應之求死不可得懊惱者戴逵一  
死博一名設想抑何癡更有商山皓服食采紫芝修短  
乃定數乞靈亦何爲我愛陶元亮乘化樂熙熙

貨財天所殖養生聊取足王衍口絕錢祖約身障籠二  
者癖懸殊處世豈可學我生但信天隨分自飲啄此外  
又何求坐臥三竿竹

山臯乃善罵舉父乃善投賦性實乖張彼果何所讐人  
生天地間受侮悄然憂所貴在能忍唾面且自由風波  
無處無應之以虛舟

荔園詩續鈔

卷四

五

性癖耽佳句出而証諸友友或面譽之快然耳親受背  
後十分讀于我夫何有況乃希揚名冥冥在身後浮生  
百年內萬事皆芻狗旨哉季鷹言不如一杯酒

露坐

浴罷蘭湯後徘徊小院幽晚涼何處雨夜靜幾分秋蛛  
網添檐角螢光綴草頭倚欄聊索句一慰杞人憂

時以  
久旱  
爲  
憂

輓鹿錫堂

嗣宗

州尊

一番巷哭一迴腸召杜連年殯此堂

距去秋沈州  
尊歿恰一年

官好

無如民福少魂歸畱得頌聲長蓮城憶把鐙前盞

十年  
前錫

堂宰松陽時與  
余府中宴會  
燕寢重分座上香惟我與  
公交耐久那  
堪芻奠淚沾裳

王容生 青榕 州尊整頓安瀾書院屬 駿 承乏課事

觀風多士招同方雪齋 成珪 龐少梅 紹福 畢豁

堂 蘊巖 公讌于水仙閣卽席賦謝二首

滿門桃李植芳菲減俸分膏更典衣風順鴻毛程萬里  
戰酣蟻陣鏢重圍薛盤尋味何嫌澹偃室來遊所貴稀  
最好琳宮文讌罷月光如水醉言歸

卅載廣文剩破瓊窩營安樂借安瀾鉛刀一割談何易

敝帚千金享亦難點筆鑪邊愁硯凍看花霧裏耐鐙殘

荔園詩續鈔 卷四 六

追思子厚家風在勇撤臬比媿始寬

### 閱觀風卷二首

展卷欣觀闔境風停披手剪燭花紅驚奇句每來天外

摸索名多在暗中 時卷用糊名 努力三番鰲首戴癡心一過

馬羣空到門剝啄頻辭客解事何須囑小僮

區區記問忝爲師點檢雲篇落筆遲漫說文章公論在

先憑得失寸心知箇中磨玷方完璧此外吹毛敢索疵

盧後王前休計較揣摩端仗刺肱時

### 擊櫟歌

歲值木饑盜竊發穿穴踰牆勢奔突區區入手欲未屢

乘間縱火逞豪奪鹽官城小數千家巷犬羣噪恠咄咄  
邑侯令做野廬氏十家一椽警四達初更戛擊到五更  
匪徒何處作生活從此里閭慶晏安一枕華胥夢仙闕  
吾衰耿耿常不寐布被年淡冷于鐵況乃逋券逼殘冬  
縱有諺臺避難脫睡魔遠去愁魔來賴有詩魔爲解結  
語不驚人死亦休何必錦囊貯心血燈光如豆影幢幢  
靜聽櫛聲繞幃闥鏗然一下一長唵分明是我催詩鉢

生涯

生涯又值硯田荒鎮日持齋法太常蒸瓠厨中寧有鴨  
踏蔬夢裏亦無羊雨稀井贄枯泉脈時久旱霜重庭階

荔園詩續鈔

卷四

七

萎米囊

庭種粟花不茂

讀罷漢書還一笑梅花細嚼者般香

和桐石題周端孝

茂蘭

先生復讐血疏後以下癸未

東林鉤黨禍最烈緹騎縲囚盡賢哲蓼洲先生怒髮衝  
豎起春梁鍊作鐵盛名竟墮羅織經誣以脏墨加嚴刑  
臨刑詈聲不絕口金剛不壞輝日星孝子鳴冤奏血疏  
思陵感動赫斯怒立誅元惡慰忠魂賜諡追封三代墓  
同時更有一梨洲鐵槌逆黨償父讐兩家一樣錚錚鐵  
至性勃發橫九秋當年傳寫天鑑錄顛倒英豪豈忍讀  
此疏流芳二百年忠介端孝爭題軸東山詩史古董狐  
一枝鐵筆綱常扶吁嗟乎一枝鐵筆綱常扶唵風弄月



何爲乎

解嘲詩賦謝龐九少梅

葉老綠變紅鬚老黑變白此理關盛衰一成而不易我  
年古稀外鬢鬢盡雪色比來領下髭星星反黧黑同輩  
掀髯笑疑我撚以墨我欲欺上官久矣辭末職我欲媚  
侍姬鰥居影已隻何爲入涅槃塗鴉作潤澤聞昔呂文  
穆夢神手拂拭朝來攬鏡看三鬚忽增益相必隨命轉  
我愧未修德或者鍊元霜憐我賜餘瀝從此駐衰顏甕  
齋得飽喫一笑謝賓朋癡語聊解惑

賦示同學

荔園詩續鈔

卷四

八

談文幾輩立森森箇裏醇疵仔細尋休道磨磚難作鏡  
終慙點鐵未成金救貧書外無他術立品寰中只此心  
各有高堂賒望眼最宜珍重是光陰

寄陳丹山

同調寧須論輩行隄安一字每商量尋常見客交多泛  
解后逢君話亦長路近定知因雨阻時和豈敢祝醫忙  
丹山  
工醫  
何當踏屐斜陽候來共冰厨煮豆香

仲夏望日王容生刺史邀同至修川仰山書院課

士與諸生公讌歸賦二律以謝

刺史憐才亦愛余豈知老矣不中書退歸偶作乘軒鶴

進步欣看縱壑魚，畫粥貧中原有味。禮羅名下定無虛。

仰山早晚宗工到，月旦如何敢毀譽。時杜文宗將按臨杭郡

花雨堂開設綺筵，中間位置廣文瓊。傳經那有金鍼度。

說法來參玉版禪。時祈晴持齋故設素饌蠶食葉聲抽藻思，燕雷

泥跡話前緣。憶丙子己卯館修川時閱會卷今朝仙侶同舟好，石井亭

邊更訪仙。舟過石井話馬自然仙跡

### 詠吳梅村綏寇紀畧事七首

賊不議勦但議撫，兩楊一熊誤如許。給餉懸牌莫敢侮，  
一飽遠颺卽抗拒。漏網魚變添翼虎，燎原之勢遍川楚。  
七擒七縱法原古，用不得法悔奚補。

### 荔園詩續鈔

#### 卷四

九

陰風四起陣雲壓，十萬賊兵魂已脅。金鑠關與車箱峽，  
趁此殲旃無遺策。胡然開網令釋甲，此輩那肯聽安插。  
要知川陝運當劫，禍福轉移只一霎。

敬軒者張賊號恣殺生靈，共嬉笑刻陳總兵以圖報祖。  
文昌帝以申禱開科無理，但取鬧委地筆硯斯文掃到。  
頭露出黑心竅，一箭當中手最妙。

十六墳葬諸李中，有一穴發祥始掘之。鐵鎗光燄紫腦，  
後一蛇騰空起腊而進之。沐恩旨闔眇一目中，流矢漫  
說仙爲定風水，斬蛇難逃赤帝子。賊囚邊令恨嚙指，乘  
間兔脫竟不死。試把羅公山事比天之賞罰，顯然矣。

傾城沽酒雜香來頃刻店作金銀臺主人一見笑口開  
笑聲未罷哭聲哀諸公醉死我卽陪寇氛一到皆成灰  
魔君努目不畏雷大家福祿方啣盃

與國休戚諸天潢均宜協力完封疆柰何藩府饒倉箱  
一任軍士虛口糧柰何藩府充筐篋一任軍士駮指僵  
助餉一椅黃金鑲遂致瓦解國隨亡吁嗟天道亦何常  
大廈傾難一木當揮金百萬推周王河隄一決終逃荒  
睢州城中迓檠戟妙舞清歌夜張席美人行酒覺薌澤  
醉倒座上興平伯夜半伏兵起複壁鐵杖不見竟顛蹶  
定國陰謀本宿隙一朝毒手逞蜂螫閣部與高最莫逆  
荔園詩續鈔卷四

十

大水後米價日昂感賦

負郭田曾供一瓢而今荒景日蕭條談經有座空存舌  
乞米無門恥折腰勁節須從貧裏見清名也要福來消  
寥寥西向長安笑

寧邑米市  
在長安鎮

洗卻愁腸水似潮

和鏡谿詠蟲

皮囊蟲所家仰食有蝨蚤蟲竟飄然來抵隙抑何巧聞  
有旅宿者帳破爲蟲勦回思家安寢中夜增懊惱一役  
手撲蟲懼歌榻邊繞道曾被桎梏束手任蟲齧今得快  
指揮乘涼豈不好宿者乃大悟歛聲直到曉人生百年

內奢願何時了作一退步想隨處獲至寶利口寓刺譏  
淡感此白鳥

和鏡谿蘿菑船 一名蘆箬船

萬壑爭流過靈洞水勢紆回穿石縫九姓船大不能容  
換作瓜皮乃適用其中偈仄復偈仄受兩三人亦嫌重  
四圍蘆箬結爲篷一線天光偶射空坐則折腰臥屈膝  
幾爲梢公所侮弄水聲濺濺作雨聲安得出險順風送  
我昔盛年亦浪遊回憶身經豈夢夢曾泛西湖坐樓船  
簫管兩頭開春甕曾泛雪谿坐竹簞冰雪孤裝受寒凍  
此遜樓船勝竹簞苦樂之間正恰中人生得過且粗過  
荔園詩續鈔 卷四 二

中秋北山厚遺賦謝

丁耽鎮日聽秋霖枯坐芸窗感最淡愁裏幾忘佳節至  
書來重費故人心乞將慧業花生筆分得豪懷鐵點金  
時見遺修 金湖頴 愧煞瓊瑤何以報臨風聊寄一長吟

題元遺山詩集

才名一代擅金源運際滄桑出處難拔舍未遑從北狩  
圍城枉自繫南冠卑卑恥奪虞楊席袞袞豪登李杜壇  
野史亭中文獻在休將詩筆等閒看

連夜夢見陳丹山醒而哭之以詩

自昔登堂送殯還淚痕頻拭未曾乾  
知心似爾重逢少歷久憐余割愛難  
寂寂孤帷燒燭短蕭蕭落葉打窗寒  
此時夢裏分明見聊當生存一晤看

和潘仲方

蓉鏡

里巫行

衣冠藍縷色嗔怒語似溫文貌似虎  
大巫中立侍小巫鎮日鬻符踞廟宇  
今年疫鬼何披猖舍沙射人誰敢當  
巫言我符善治病勝于龍授千金方  
一村庸衆被侮弄長魚大截作齋供  
巫口喃喃手畫符雙睛早向盤中送  
我聞鬱壘除神姦暮吞八百朝三千  
此巫伎倆竟烏有只圖醉飽多緡錢  
吁嗟哉里中有巫人不死盜得虛聲  
荔園詩續鈔卷四

三

良可恥一朝途遇黎邱鬼有符不能救厥子

腰痛

鼠肝蟲臂總由天可柰支離入耄年  
五斗曾經憐我折萬金畢竟讓人纏  
呻吟伏枕朝難起免強扶筇晝亦眠  
早晚出門羣賀歲傳言求恕帖紅箋

容生刺史邀同方雪齋龐少梅率安瀾書院諸生

恭謁

至聖先師兼諭與

駿

行相見禮紀事二

首奉謝

以下甲申

釋菜先師共蕤香雍雍揖遜燦分行  
攝官偶効鉛刀割扁試終煩玉尺量

時將州試

同道爲朋須礪節盈科後進自

成章魯侯色笑均叨寵流澤還逾泮水長

坐擁皋比本僭奢一時感愧意交加追隨未必中心悅  
矍鑠空承衆口誇退院枯僧重說法吹簾老婢亦簪花  
擬酬知己腸真熱歸飲清涼七椀茶

過麟祥巷陳丹山門外感賦二首

聞笛山陽最斷魂飄零遺挂想生存幾人嘲我炎涼態  
巷口頻過不入門

一樹垂垂老屋邊出牆枝已破晴煙花前嘯詠人何在  
春色依然似去年

子藍主政招同人雅集盟蘭山館分韻得盛字

荔園詩續鈔

卷四

三

吾衰世故百不稱文會欣逢御引興雨華堂上昨張筵  
唵舫重邀醉未醒

仰山書院課日同人公譏雨華堂是夕北山刺史又招飲于唵舫子

藍水部劇愛客東閣觀梅今復請盟蘭是我舊棲處花  
石依然掃三徑東南得朋一一來雅比西園會更盛毋  
陣縱橫百罰嚴我亦努力冀其勝漫推矍鑠哉此翁搔  
首何堪對明鏡且趁吳歎習未除欲以巴歛繼長慶主  
人高誼薄雲漢縱有瓊華報難罄歸舟一路臥唵詩恰  
與啣啞櫓聲應

題西興股堰王夫人廟并序

蕭山西堰水恠所窟里正楊伯遠屢築屢圯被

責瀕危王夫人割臂投潭隨以身殉堰遂告成  
里人爲之立廟嘉慶元年吉中丞奏聞賜額曰  
精誠屹衛朱太傅文正公作碑記其事

楓林環社鎖江霧接翅神雅喚朝暮明璫翠羽貌如生  
颯颯靈風鎮古渡伊昔蕭然亘西堰恠物憑依最險處  
攻岸健似猪婆龍廢盡金錢築不固可憐破產揚亭長  
對泣牛衣柰筆楚夫人拜禱割其肱擲向重淵供饜飫  
宛如干將仗莫耶剪髮投鑪神鼓鑄此時風雲亦變色  
驅逐妖魔六丁護從此川后願効靈虹堤堅臥西陵路  
九重褒詔鳳窠來額賜精誠表墟墓側聞惡谿變好  
荔園詩續鈔

卷四

十四

谿善政感召段柯古豈知巾幗一丈夫天心頓改艱難  
步我也鼂江屢問津碑記羣傳朱太傅擬歌楚些弔貞  
魂愧乏錦囊嘔心句

題桃花扇六首

撒空珠翠致淋漓激烈當場卻聘時千古英雄讓巾幗  
笑他姦黨盡鬚眉

旖旎中兼俠氣存青樓端可愧朱門桃花扇上紅千點  
不染臙脂井畔痕

宮闕參差化野煙二分明月尙團圓秦淮鐙舫今何在  
誰演新翻燕子箋

玉樹花開宴後庭一班狎客伴東昏拜壇雖向思陵哭  
誰弔江頭閣部魂

正氣淪亡國本虛東林餘黨剷根株到頭圓海遭神殛  
褲子褶中躲得無

蘇柳相逢兩鬢霜漁樵寄跡話滄桑梨園子弟如煙散  
愁聽彈詞剩妥孃

偷安和桐石元韻

浮生逆旅豈求寬得一枝栖儘足安富不如貧今始悟  
事常稱意古來難禽何所感呼歸去花最相宜號合歡  
借問黃梁炊熟否夢時須作醒時看

荔園詩續鈔

卷四

五

題桐石詠元祐黨人碑詩後

黨人百二號清流端禮門前片石雷打盡何難歸一網  
垂名翻得擅千秋禍根章蔡空中造災釀徽欽塞外遊  
詠古森然參史筆陽剛畢竟勝陰柔

用原  
詩意

容生刺史奉檄之楚告假歸省作歌送之

中丞入覲瞻天顏歸來喜問寢門安萊衣香惹御  
鑪氣春酒正熟開瓊筵羣僚鞠脰盡珠履中有刺史亦  
孝子刺史莅澗年復年眷戀椿庭曠甘旨竭來令採首  
山銅天假之緣經楚中一朝捧檄心竊喜陳情歸省私  
而公我公自作鹽官宰器逢盤錯再礪乃嚮晨判案夜



衡文事倍古人功亦倍民歌五袴士誦絃願公久住休  
鶯遷忽聞檄下各驚訝連詞籲請將畱鞭公亟搖手諭  
止止借寇成規不若此人生無別聚不樂況乎小別數  
月耳掃除驛館金風涼看攜琴鶴無他裝五里十里一  
祖餞布颿安穩身康強賤子與公最莫逆寵珍時啖牛  
心灾無算之爵手親樹祝公高堂歲滿百明年有脚陽  
春回萬花陌上爭先開紳耆環遶羨迎養老人星並福  
星來

重陽前五日容生刺史招同人雅集陳園話別卽  
席賦謝兼以贈行四首

荔園詩續鈔

卷四

十六

最愛延清水一隈狎鷗羣集了無猜使君禮數寬如許  
那有松間喝道來

楚尾吳頭刻日行簡書可畏有嚴程重陽自古多風雨  
天爲公歸特放晴

官船如葉度重關灑脫清風拂袖還百幅頌詩當衣錦  
高堂料得亦歡顏

臨歧勸飲兩三杯民瘼關心首重回秋汛安瀾田稻熟  
此行懷抱儘須開

營壽域于第瑩之左醉後得詩二首

歷盡悲懽剩白頭蒼茫八十四春秋浮生僅等桑三宿

結局同歸貉一邱冥漠行修兄弟好經營代作子孫謀  
瑤函寄到齊稱祝免得他時助麥舟  
鬱恩古樹噪羣雅白鶴亭前水一涯吉土旣然成片段  
術師何必費安排聊陪靖節生爲誅卻遜劉伶死便埋  
萬事破除惟有酒醉聽輿誦且開懷

### 負暄行

昨夜颺風動茅屋吹破紙窗捲畫軸多年布被冷于冰  
七尺身蟠作蜩伏朝來門鵲喚我起黃絛襖子出暘谷  
婆娑牖下坐且行頓覺奇溫遍手足此時豪疾銷金帳  
低唱淺斟侍燕玉四角紅鑪蠟代薪何曾送炭念惇獨  
荔園詩續鈔卷四  
達士從來隨遇安負暄何必非清福得煖沈沈欲睡去  
家人報道煨芋熟

### 老景

長夜漫漫漏響遲且將老景賦新詩食先防噎糜方可  
煖必需人睡始知禮記八十非人不煖不信面諛稱嬰鑠每踰心  
矩假聾癡等閒也有分甘樂又是紛紛餽歲時

### 課後遣興

米價羣傳日漸平老夫依舊拙謀生追呼急似催詩債  
豐稔安能到筆耕齊物不須論得失固窮于此驗工程  
書中滋味猶然在喜聽童孫肄業聲

寄懷梁聲大病後

聞說沈疴歷半年扶持今幸得平安歲闌冗務推須遠  
愈後元神復最難莫道中醫宜勿藥且休努力勸加餐  
一番痛癢相關語只當伴行拜送看

除夕口占

家計有無了不知阿翁愈老愈聾癡貧非病也真堪賀  
歲自歸兮底用辭香煮菜根憐婦巧紅搖燭影看孫嬉  
等閒便見天心轉坐對盆梅且詠詩

時子藍見  
贈盆梅

荔園詩續鈔

卷四

六

